

SULIT



LEMBAGA PEPERIKSAAN
KEMENTERIAN PENDIDIKAN MALAYSIA

SIJIL PELAJARAN MALAYSIA 2017

BAHASA MELAYU

Kertas 1

Jun

$2\frac{1}{4}$ jam

1103/1

Dua jam lima belas minit

JANGAN BUKA KERTAS PEPERIKSAAN INI SEHINGGA DIBERITAHU

1. *Kertas peperiksaan ini mengandungi dua bahagian: Bahagian A dan Bahagian B.*
2. *Jawab soalan Bahagian A dan satu soalan daripada Bahagian B.*
3. *Jawapan anda hendaklah ditulis di dalam buku jawapan yang disediakan. Sekiranya ruang jawapan tidak cukup, sila dapatkan helaian tambahan daripada pengawas peperiksaan.*
4. *Jawapan boleh ditulis dalam tulisan Rumi atau Jawi.*

Kertas peperiksaan ini mengandungi 3 halaman bercetak dan 1 halaman tidak bercetak.

[Lihat halaman sebelah

1103/1 © 2017 Hak Cipta Kerajaan Malaysia

SULIT




Bahagian A

[30 markah]

[Masa dicadangkan : 45 minit]

Lihat gambar di bawah dengan teliti.

Huraikan pendapat anda tentang **kepentingan pasar tani**. Panjangnya huraian hendaklah antara 200 hingga 250 patah perkataan.

KEPENTINGAN PASAR TANI

Memasarkan hasil pertanian yang segar

Harga yang berpatutan

Membantu peniaga-peniaga kecil

Bahagian B

[100 markah]

[Masa dicadangkan : 1 jam 30 minit]

Pilih **satu** daripada soalan di bawah dan tulis sebuah karangan yang panjangnya **lebih daripada 350 patah perkataan**.

- 1** Kehidupan pada hari ini yang penuh dengan cabaran boleh menyebabkan kita mengalami stres. Oleh sebab itu, kita perlu bijak menangani stres tersebut.
Jelaskan cara-cara menangani stres.
- 2** Melancong bersama-sama keluarga mendatangkan banyak kebaikan.
Huraikan kebaikan-kebaikan melancong bersama-sama keluarga.
- 3** Anda akan mengambil bahagian dalam satu pertandingan syarahan. Tajuk syarahan anda ialah 'Peranan Sukan dalam Mengharumkan Nama Negara'.
Tulis teks syarahan itu selengkapnya.
- 4** Program pertukaran pelajar antara negara memberikan banyak manfaat kepada pelajar dan negara yang terlibat.
Bincangkan manfaat-manfaat program tersebut.
- 5** Peribahasa 'setinggi-tinggi terbang bangau, akhirnya hinggap di belakang kerbau juga' bermaksud ke mana kita pergi, akhirnya balik ke tempat asal.
Tulis sebuah cerita berdasarkan maksud peribahasa tersebut.

KERTAS PEPERIKSAAN TAMAT



LEMBAGA PEPERIKSAAN
KEMENTERIAN PENDIDIKAN MALAYSIA

SIJIL PELAJARAN MALAYSIA 2017

BAHASA MELAYU

Kertas 2

Jun

2½ jam

1103/2

Dua jam tiga puluh minit

JANGAN BUKA KERTAS PEPERIKSAAN INI SEHINGGA DIBERITAHU

1. *Kertas peperiksaan ini mengandungi empat soalan.*
2. *Jawab semua soalan.*
3. *Jawapan bagi Soalan 2(b), Soalan 2(c), Soalan 2(d) dan Soalan 4 berdasarkan teks Komponen Sastera Melayu Tingkatan 4 dan Tingkatan 5.*
4. *Jawapan anda hendaklah ditulis di dalam buku jawapan yang disediakan. Sekiranya ruang jawapan tidak cukup, sila dapatkan helaian tambahan daripada pengawas peperiksaan.*
5. *Jawapan boleh ditulis dalam tulisan Rumi atau Jawi.*

Kertas peperiksaan ini mengandungi 10 halaman bercetak dan 2 halaman tidak bercetak.

[Lihat halaman sebelah



Soalan 1 : Rumusan

[30 markah]

Baca petikan di bawah dengan teliti, kemudian buat satu rumusan tentang **cara-cara menguruskan kewangan dan peranan pelbagai pihak mendidik masyarakat supaya berbelanja secara berhemat**. Panjangnya rumusan hendaklah **tidak melebihi 120 patah perkataan**.

Umumnya, hanya sebilangan kecil generasi muda di negara kita yang bijak menguruskan kewangan. Kebanyakan daripada mereka gagal menguruskan kewangan atas pelbagai faktor. Antaranya, mereka lebih mementingkan gaya hidup tanpa memikirkan kesannya terhadap kemampuan kewangan mereka. Amalan suka memiliki telefon pintar atau alat berteknologi tercanggih di pasaran dan bertukar-tukar model terbaharu menjadi trend generasi kini. Hal ini menunjukkan generasi muda perlu mempunyai ilmu tentang pengurusan kewangan lebih-lebih lagi semasa berlakunya kegawatan ekonomi. Sewajarnya, generasi muda dinasihati supaya tidak membazir ketika berbelanja. Hal ini demikian kerana sebilangan daripada mereka gemar membeli barangan berjenama yang mahal harganya yang menyebabkan mereka menghadapi masalah dalam menguruskan kewangan. Mereka sepatutnya menyediakan senarai perbelanjaan untuk memastikan kewangan sentiasa terurus.

Kebanyakan generasi muda yang baru memasuki alam pekerjaan perlu membayar balik wang pinjaman pembiayaan pelajaran. Dalam hal ini, mereka sepatutnya memperuntukkan sebahagian daripada pendapatan bulanan untuk membayar balik wang pinjaman tersebut. Perkara ini sangat penting bagi memastikan mereka dapat menguruskan kewangan masing-masing. Dalam hal perkahwinan pula generasi muda gemar memilih pakej perkahwinan yang terdapat di pasaran. Mereka seharusnya memilih pakej perkahwinan mengikut kemampuan masing-masing. Pada masa yang sama, kos yang tinggi diperlukan untuk memulakan penghidupan baru dalam berkeluarga. Oleh hal yang demikian, pasangan yang baru berkahwin disarankan supaya tinggal bersama-sama ibu bapa sebagai langkah penjimatan. Dalam tempoh berkenaan, pasangan tersebut dapat menabung untuk dijadikan wang pendahuluan bagi membeli rumah. Sebenarnya, pembelian rumah pada usia muda adalah lebih baik untuk mendapatkan tempoh pembiayaan yang lebih anjal. Bagi pasangan yang menyewa rumah, mereka perlulah memastikan kadar sewaan rumah tidak melebihi 30 peratus pendapatan bulanan isi rumah.

Pengurusan kewangan juga perlu diberi perhatian sebelum sesebuah keluarga merancang untuk melancong. Kebanyakan keluarga di Malaysia akan melancong sekurang-kurangnya sekali dalam setahun kerana pelancongan merupakan aktiviti yang dapat *mengeratkan hubungan* kekeluargaan. Sehubungan dengan itu, perancangan awal untuk menguruskan kewangan bagi tujuan melancong perlu dilakukan. Kita juga janganlah mengikut nafsu ketika berbelanja terutamanya apabila kita mempunyai wang yang lebih. Sebagai contoh, apabila mendapat bonus, pelbagai keinginan akan terlintas dalam fikiran seperti kereta baharu, perabot baharu dan percutian. Pengurusan kewangan menjadi semakin mencabar apabila kad kredit mudah dimiliki. Penggunaan kad kredit secara sewenang-wenangnya menyebabkan penggunanya menanggung beban hutang. Oleh itu, perbelanjaan dengan menggunakan kad kredit perlu dikawal. Sesungguhnya kejayaan dalam pengurusan kewangan seseorang bergantung pada usaha masing-masing.

Dipetik dan diubah suai daripada
'Gen Y Suka Membazir'

oleh Alzahrin Alias,
Berita Harian, 15 Mac 2014

Soalan 2 : Pemahaman

[35 markah]

Soalan 2(a) – Petikan Umum

Berdasarkan petikan **Soalan 1**, jawab soalan-soalan yang berikut dengan menggunakan ayat anda sendiri.

- (i) Berikan maksud rangkai kata *mengeratkan hubungan*. [2 markah]
- (ii) Pengarang menyatakan bahawa generasi muda gagal menguruskan kewangan atas pelbagai faktor.
Kemukakan faktor-faktor tersebut. [3 markah]
- (iii) Aktiviti melancong bersama-sama keluarga memerlukan kos yang agak tinggi.
Jelaskan pendapat anda tentang cara-cara untuk memastikan aktiviti melancong bersama-sama keluarga tidak membebankan kewangan. [4 markah]

[Lihat halaman sebelah

Soalan 2(b) – Petikan Prosa Moden

Baca petikan cerpen di bawah dengan teliti, kemudian jawab soalan-soalan yang berikutnya dengan menggunakan ayat anda sendiri.

Hakim membuat keputusan memasuki bidang penternakan bersandarkan beberapa faktor. Dia selalu sangat mendengar para menteri dan pakar ekonomi berkata, “Pada masa sekarang ini kerajaan sangat mementingkan aktiviti pengeluaran makanan. Negara mesti mengeluarkan lebih banyak makanan.”

Sejak dahulu, dia sering mendengar pidato, “Tuan-tuan dan puan-puan, sebahagian besar bahan makanan rakyat kita ialah bahan makanan yang diimport, sedangkan kita ada ratusan ribu ekar tanah yang terbiar kosong dan tidak produktif. Mengapakah kita bergantung pada beras, ikan, daging, ayam, dan sayur-sayuran import? Keadaan ini akan membahayakan kita kalau terjadi sesuatu bencana. Kerajaan mengutamakan bidang pengeluaran makanan kerana ini soal keselamatan negara.”

Pemimpin tertinggi sendiri pernah berkata, “Rakyat mesti membuka mata dan melihat potensi yang ada dalam bidang pertanian. Saya menyeru kepada rakyat sekalian agar merebut peluang ini, terutama ribuan siswazah Melayu yang masih menganggur. Kerajaan menyediakan banyak peluang terutama kepada keistimewaan dalam Dasar Ekonomi Baru. Ada pelbagai bantuan dan skim pembiayaan untuk projek pertanian yang dikendalikan oleh sebuah bank khusus. Nah, semuanya ada di hadapan anda! Yang diperlukan sekarang ialah kesanggupan anda untuk bekerja kuat. Ingat slogan ini, ‘Pertanian adalah Perniagaan’.”

Dipetik daripada cerpen ‘Kaduk, Ayam dan Raja’
oleh Zurinah Hassan
dalam antologi *Jaket Kulit Kijang dari Istanbul*,
Kementerian Pendidikan Malaysia

- (i) Berdasarkan petikan cerpen di atas, nyatakan sebab-sebab kerajaan sangat mementingkan aktiviti pengeluaran makanan. [2 markah]
- (ii) Hasil pertanian bukan sahaja untuk kegunaan dalam negara malahan boleh dipasarkan ke luar negara.
Berikan cadangan-cadangan anda agar negara-negara lain berminat untuk mengimport hasil pertanian negara kita. [3 markah]
- (iii) Huraikan **satu** pengajaran yang terdapat dalam petikan di atas dan **satu** pengajaran lain daripada keseluruhan cerpen yang tidak terdapat dalam petikan. [4 markah]

Soalan 2(c) – Petikan Prosa Tradisional

Baca petikan prosa tradisional di bawah dengan teliti, kemudian jawab soalan-soalan yang berikutnya dengan menggunakan ayat anda sendiri.

Maka ada seorang orang Kelang mengatakan dirinya teraniaya oleh Tun Perak sedikit. Maka ia berdatang sembah ke bawah duli baginda. Maka baginda memberi titah kepada bentara Seri Amerta, menyuruh berkata kepada Tun Perak. Maka Tun Perak pun datang menghadap. Maka Seri Amerta pun berkata kepada Tun Perak, “Orang ini, ya Tuan Tun Perak, *mengadukan halnya* ke bawah Duli Yang Dipertuan, mengatakan dirinya teraniaya oleh Tun Perak. Mengapakah maka demikian pekerti tuan hamba?”

Maka diam Tun Perak tiada disahutinya kata Seri Amerta itu. Setelah tiga kali Seri Amerta berkata-kata itu, maka barulah disahutinya oleh Tun Perak, katanya, “Tuan Seri Amerta, akan tuan hamba dijadikan Yang Dipertuan Bentara, dianugerahi pedang sebilah itu jua tuan hamba peliharakan baik-baik, usahakan jangan diberi berkarat kemakanan. Akan pekerjaan kami orang memegang negeri di mana tuan hamba tahu? Jikalau sebesar tempurung sekalipun, negeri namanya; baik juga kepada kami, maka kami kerjakan, kerana Yang Dipertuan tahu akan baiknya juga kepada kami, tiada tahu akan jahatnya. Tetapi jikalau Duli Yang Dipertuan hendak mencerca hamba sebab orang itu, pecatlah hamba dahulu, maka cercakan hamba dengan dia. Jikalau hamba belum dipecat, bagaimana hamba hendak dicerca?”

Syahadan maka berkenan Sultan Muzaffar Syah mendengar kata Tun Perak itu. Pada hati baginda, “Adapun Tun Perak ini tidaklah patut jadi bentara lagi, patut menjadi Perdana Menteri.”

Dipetik daripada
‘Burung Terbang Dipipiskan Lada’
dalam antologi *Sejadah Rindu*
Kementerian Pendidikan Malaysia

- (i) Berikan maksud *mengadukan hal*. [2 markah]
- (ii) Seri Amerta bertanyakan Tun Perak tentang aduan seorang orang Kelang bahawa dirinya telah dianiayai oleh Tun Perak.
Apakah penjelasan Tun Perak setelah mendengar kata-kata Seri Amerta itu? [3 markah]
- (iii) Tindakan Seri Amerta mempercayai aduan seorang orang Kelang bahawa dirinya dianiayai oleh Tun Perak adalah tidak wajar.
Adakah anda bersetuju dengan pernyataan tersebut? Nyatakan alasan-alasan anda. [3 markah]

Soalan 2(d) – Sajak

Baca sajak di bawah dengan teliti, kemudian jawab soalan-soalan yang berikutnya dengan menggunakan ayat anda sendiri.

Pesan Lelaki Kecil kepada Gadis Kampus

Kuhantar kau mengecapi angin baru
udara lain dari kampung bendang kuningmu
bumantara asing dari yang sering kaumesrai
yang sama sekali berbeza
dengan suasana suntimu
kaunikmatilah angin dan udara ilmu itu
memesrai azimat dan tangkal
dari tangga gading.

Kulepaskan kau menjadi burung putih
dengan sayap berkembang
menongkah awan perak dan kabut dingin
menengal kalimat hujan dan bilah petir
menyelit antara sembilu nasib
dan waras akal.

Di awan kampus yang sarat ilmu
hadir sihir angin bernafas api
di pohon kampus yang tegar status
berceracak selumbar noda mengabur fikir
di padang kampus yang hijau pertimbangan
tumbuh gunung ego menghalau pekerti.

Pandai-pandailah kau terbang
menongkah awan mulus dan kabus dingin
jangan kau pulang
dengan percikan duka dan balutan luka
di sayapmu yang patah.

SAZALEE YACOB

Antologi *Sejadah Rindu*

Kementerian Pendidikan Malaysia

- (i) Berdasarkan **rangkap akhir** sajak tersebut, apakah pesanan-pesanan penyajak kepada gadis kampus? [2 markah]
- (ii) Selain mengejar kecemerlangan akademik, mahasiswa juga perlu memberikan sumbangan kepada masyarakat.
Pada pendapat anda, bagaimanakah mahasiswa boleh memberikan sumbangan kepada masyarakat? [3 markah]
- (iii) Jelaskan **satu** persoalan yang terdapat dalam **rangkap pertama** dan **satu** persoalan yang terdapat dalam **rangkap kedua** sajak tersebut. [4 markah]

Soalan 3 : Pengetahuan dan Kemahiran Bahasa

[30 markah]

Jawab semua soalan.

(a) Tulis dua ayat bagi setiap perkataan di bawah untuk menunjukkan perbezaan maksud dan penggunaannya. Anda tidak boleh menambahkan imbuhan atau menggunakan perkataan itu sebagai peribahasa atau nama khas.

- (i) ganjil
- (ii) kabinet
- (iii) lapang

[6 markah]

(b) Nyatakan pola ayat bagi ayat-ayat di bawah ini sama ada **Frasa Nama + Frasa Nama (FN + FN)**, **Frasa Nama + Frasa Kerja (FN + FK)**, **Frasa Nama + Frasa Adjektif (FN + FA)** atau **Frasa Nama + Frasa Sendi Nama (FN + FS)**.

- (i) Rakyat Malaysia amat bangga akan keindahan alam semula jadi di negara ini.
- (ii) Anai-anai sejenis serangga perosak dan pemusnah dalam senyap.
- (iii) Semangat 1Malaysia mengukuhkan perpaduan kaum.
- (iv) Kami ke Muzium Negara pada hujung minggu lepas.
- (v) Hubungan kekeluargaan sangat penting dalam pembentukan keluarga bahagia.
- (vi) Sebuah agensi pelancongan telah menaja dua orang murid cemerlang melancong ke Australia.

[6 markah]

(c) Dalam setiap ayat di bawah terdapat **satu kesalahan ejaan dan satu kesalahan dari segi imbuhan**. Senaraikan dan betulkan kesalahan-kesalahan itu. Bagi setiap ayat, anda tidak boleh menyenaraikan lebih daripada satu kesalahan ejaan dan satu kesalahan dari segi imbuhan. Anda tidak perlu menyalin ayat itu semula.

- (i) Pertandingan diklamasi puisi sempena hari kebangsaan anjuran Dewan Bahasa dan Pustaka telah mendapat disertai daripada pelbagai kaum.
- (ii) Perasaan curiga atau was-was merupakan masalah yang dialami oleh sesetengah orang sehingga menyukar seseorang itu menilai dan membuat keputusan terhadap sesuatu perkara.
- (iii) Jabatan Imigresen memaklumkan bahawa terdapat pelbagai faktor yang dapat dikaitkan dengan sinareo peningkatan ketara dari segi kemasukkan pekerja asing ke negara kita.

[6 markah]

(d) Dalam setiap ayat di bawah, terdapat **satu kesalahan penggunaan kata atau istilah dan satu kesalahan tatabahasa**. Senaraikan dan betulkan kesalahan-kesalahan itu. Bagi setiap ayat, anda tidak boleh menyenaraikan lebih daripada satu kesalahan penggunaan kata atau istilah dan satu kesalahan tatabahasa. Anda tidak perlu menyalin ayat itu semula.

- (i) Pelancong daripada Jepun itu terpegun semasa melihat kemahiran orang buta itu menyulam bakul rotan dengan pantas.
- (ii) Kerajaan seharusnya memberikan pembebasan cukai atas pembelian rumah mampu milik demi untuk meringankan bebanan rakyat yang berpendapatan rendah.
- (iii) Kementerian Pendidikan mengingatkan pentadbiran sekolah yang mereka boleh dikenakan tindakan tatatertib sekiranya menyimpan kes disiplin yang berlaku di sekolah masing-masing.

[6 markah]

(e) Berikan peribahasa yang bersesuaian dengan maksud peribahasa di bawah.

- (i) Pelbagai kesusahan ditempuh sebelum menikmati kesenangan.
- (ii) Berani bertindak kerana tidak melakukan kesalahan.
- (iii) Orang yang berjasa itu akan selalu disebut-sebut namanya walaupun telah meninggal dunia.

[6 markah]

Soalan 4 : Novel

[15 markah]

Jawab soalan-soalan di bawah berdasarkan novel-novel yang berikut:

- (i) Leftenan Adnan Wira Bangsa karya Abdul Latip bin Talib
- (ii) Di Sebalik Dinara karya Dayang Noor
- (iii) Jendela Menghadap Jalan karya Rohaini Matdarin
- (iv) Pantai Kasih karya Azmah Nordin
- (v) Songket Berbenang Emas karya Khairuddin Ayip
- (vi) Tirani karya Beb Sabariah
- (vii) Bimasakti Menari karya Sri Rahayu Mohd Yusop
- (viii) Silir Daksina karya Nizar Parman

(a) Tulis sinopsis **sebuah** novel yang telah anda pelajari. [7 markah]

(b) Watak dalam sesebuah novel sering dikaitkan dengan pelbagai cabaran.

Berdasarkan **sebuah** novel yang telah anda kaji, huraikan **dua** cabaran yang dihadapi oleh watak yang telah ditetapkan.

	Novel	Watak
i.	Leftenan Adnan Wira Bangsa	Leftenan Adnan
ii.	Di Sebalik Dinara	Farisha
iii.	Jendela Menghadap Jalan	Lili
iv.	Pantai Kasih	Doktor Raiha
v.	Songket Berbenang Emas	Dahlia
vi.	Tirani	Waheeda
vii.	Bimasakti Menari	Nurul Hafsa
viii.	Silir Daksina	Haiqal

[8 markah]

KERTAS PEPERIKSAAN TAMAT